

**Uunga siunnersuut: Inissianik attartortitsisarneq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx. xxx 2021-meersaq**  
 (Attartornermi akiligassap akilerneqarfissaa, inissianik attartortittakkanik oqoqalersimasunik nalunaarsuineq kiisalu suliffimmut atatillugu inissianik oqoqarsimasunik innersuunneqartunik itigartitsisinnaatitaaneq)  
 (Ineqarnermut, Attaveqaasersuutinut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

### **Akissuteqaat**

(Ineqarnermut, Attaveqaasersuutinut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

### **Aappassaarneerpeqarnera**

Sanaartornermut Ataatsimiititaliap isumaliutissiissutaanut Naalakkersuisut sinnerlugit qujavunga. Siunnersuutip akuersissutigineqarnissaa Sanaartornermut Ataatsimiititaliap isumaqatigiittup inassutigimmagu nuannerpoq.

Siunnersuutip suliarineqarnissaanut atatillugu erseqqissaataasinnaasunik arlaqartunik Sanaartornermut Ataatsimiititaliaq Naalakkersuisunut apeqquteqarpoq.

Ullut 14-ikkaarlugit akissarsisartut akissarsinerminnut atatillugu qaammammut marloriarlutik inissiamut akiliinissamut periarfissaannut sunniuteqassanersoq Sanaartornermut Ataatsimiititaliap apeqqutigaa.

Inissiaatileqatigiiffiit ataasiakkaat inatsisitigut periarfissaqalersussat namminneq aalajangissavaat. Qanoq ingerlaaseqassanersoq inissiaatileqatigiiffinit ersarissarneqassaaq. Siunissami attartornermut isumaqatigiissutaajumaartussat siunnersuummi kisimik pineqassapput, taamaattumillu attartornerit nutaat ilutigalugit atuutsilersikkiartuaarsinnaassalluni.

Oquk patsisaalluni inissiamik innersuunneqartumik attartortup tigusiumannginnerani inissianut inoqanngitsunut ingerlatsinermi tapiissuteqartarnikkut, pisortani atorfillit atorfimminnut atatillugu inissaminnik innersuunneqarsimasut immikkut ittumik pitsaanerusunik atugassaqartinneqassanersut Sanaartornermut Ataatsimiititaliap paasissallugu kissaatigaa. Attartortup atorfimminut atatillugu inissiaq innersuunneqartoq oqoqarsimanagera patsisaalluni tigujumangippagu, inatsisissatut siunnersuutitigut najugaqarfiit aningaasatigut annaasanut ilaatigut taarsiiffigitittussaammata, najugaqarfimmut atorfimmut atatillugu inissiaqarfiusumut iluaqutaanerusussaavoq. Taamaakkaluartoq ingerlatsinermi tapiissutit piffissami ersarinnerusumik nassuiaatigineqartumi atorunnaartussaammata, ataavartumik iluaqutigineqassanngilaq.

Inissaaleqinerujussuaq patsisaalluni inissiamik nalinginnaasumik innersuunneqartumik innuttaasup tigusiumannnginnissaanut ilimanassusaa appasissorujussuuvoq, illuatungaani atorfillit atorfimminnut atatillugu inissaminnik innersuunneqartut, akuerisassaminnik atorfimminnut atatillugu inissaminnik innersuunneqarnissami tungaannut utaqqiisigalugu ineqartitaasarlitik. Alla aqutigalugu innuttaasunut inissaminnik innersuunneqartunut sanilliullugit, atorfillit atorfimminnut atatillugu ineqarsinnaatitaasut taamatulli inissisimassanngitsut ilimanarnerulersippaa.

§32a-mi imm. 1-imi aalajangersakkami atorfimmut atatillugu inissianik attartortut kisimik pineqartatik pisortat inissiaataannik attartortittakkanik attartortut tamarmik pineqarput, tamatumalu kingunerisaanik pisortat inissiaataat tamarmik ukiut tallimat kingulliit oqoqarsimanersut nalunaarsorneqassallutik. Tamanna tunuliaqutaralugu pisortat inissiaataanni attartortittakkani attartortut tamarmik pineqarmata, attartortunik immikkoortitsisoqassanngilaq.

Sanaartukkat nutaat oqoqaleratarsinnaanerit ingalassimatinniarlugu, sanaartornermi atortut oquup naaffigerpiarsinnaanngisai sapinngisamik toqqarneqartarput. Tamatuma saniatigut pilersaarutit ingerlanerini sanatitsisut nakkutilliinermikkut uuttortaanermikkullu, sanaartukkat iluisa isugutannginnissaat qulakkeertarpaat. Inatsit atuutilerpat, inissianik oqoqalersimasunik nalunaarsuisimaneq ukiuni tallimani atuuttassaaq.

Pisortani atorfilinnut atorfimmut atatillugu inissiat innersuunneqartartut INI A/S-imit, Iseritmit Illuut A/S-imiillu aqunneqarput. Illuut A/S aqutigalugu inissianut attartortittakkanut Illuut A/S nammineq piginnittuugami, inissiat oqoqarsimasut pillugit nalunaarsuisussaataaernermit pisussaaffeqartunut ilaatinneqanngilaq. Taamaattumik pisortani atorfillit atorfimminnut atatillugu inissaminnik innersuunneqartaraluartut, tassunga tunngatillugu namminersortutut attartortitsisutut isigineqassapput. Taamaattumik inissiamik Illuut A/S-imit pigineqartumik atorfimmut atatillugu inissamik innersuunneqartumik atorfillit itigartitsisinnaanngillat.

Tamatuma saniatigut §32-mi imm. 3 naapertorlugu atorfimmut atatillugu inissiat oqoqarsimasut kisimik nalunaarsorneqartussaasutut paasineqarsinnaanera, Sanaartornermut Ataatsimiititaliap uparuarppaa. Tamanna ilumuunngilaq, inatsimmulli allannguutit kingunerisai ersarissisimatinnagit aningaasaqarnikkut kingunissai naatsorsorneqarsinnaanngimmata, periarfissaq ilaatinneqarluni. Tamanna inatsimmut allannguutissat pillugit § 32-mi imm. 3-mut nassuiaatini atuarneqarsinnaavoq: ”  
*Nalunaarsuiffimmik pilersitsinermut ingerlatsinermullu aningaasartuutissat aningaasartuutissatut naatsorsuutigineqartunit amerlanerusut paasinarsissappat, Naalackersuisut malittarisassanik aalajangersaasinnaapput, taannalu malillugu suliffimmut atatillugu inissiat attartortitassatut assersuutigalugu naalagaaffimmi atorfilinnut, Inatsisartunut, Naalackersuisunullu innersuunneqartut kisimik nalunaarsuisussaataaernermit ilaatinneqassapput.*”

Inaarutaasumik nalunaarutigissavara, siunnersuutip kalaallisoortaani naleqqutinngitsut nalaanneqarsimmammata, tamannalu iluarsiivigiumallugu immikkoortup pingajussaaneerneqarnissaani allannguutissatut siunnersuut saqqummiunneqassalluni.